

KATA ADJEKTIF DALAM DIALEK MELAYU KEDAH: SATU PEMERIAN AWAL

NUR HAFIZAH TERMIZI
Universiti Kebangsaan Malaysia
hafizahkorea@gmail.com

KARTINI ABD. WAHAB*
Universiti Kebangsaan Malaysia
kartini@ukm.edu.my

* Pengarang Perantara

ABSTRAK

Dialek Melayu Kedah (DMK) sebagaimana juga dialek-dialek Melayu yang lain, mempunyai ciri-ciri linguistik yang tersendiri dari aspek fonologi, morfologi, sintaksis dan juga semantikanya. Setiap ciri tersebut mewakili keistimewaan DMK dan memaparkan keunikan masyarakat penuturnya. Sehubungan dengan itu, makalah ini bertujuan untuk membincangkan salah satu ciri linguistik dalam DMK, menerusi pemerian tentang aspek kata adjektifnya. Sebagai satu penelitian yang bersifat awal, makalah ini akan memfokuskan perbincangan tentang jenis kata adjektif dalam DMK dan ciri-ciri kata penguat yang hadir bersama kata adjektif DMK. Untuk tujuan tersebut, satu kajian lapangan dijalankan di salah sebuah kampung yang terletak di daerah Padang Terap, Kedah. Pengumpulan data melibatkan kaedah temu bual, rakaman dan catatan, yang melibatkan lima orang penutur natif DMK yang dipilih berdasarkan kriteria NORM/F (*non-mobile, old, rural, male/female speakers*). Data yang diperoleh dianalisis secara deskriptif selaras dengan tujuan kajian. Dapatan kajian ini telah menemukan 19 jenis kata adjektif dalam DMK. Setiap kategori kata adjektif tersebut digunakan dalam pelbagai domain kehidupan sehari-hari masyarakat penutur DMK dikaji. Seterusnya, dapatan kajian juga menemukan 67 unsur kata penguat yang muncul bersama kata adjektif dalam DMK. Kata penguat tersebut didapati hadir di posisi selepas kata adjektif DMK. Keseluruhannya walaupun jenis kata adjektif dalam DMK mempunyai persamaan jenis dengan Bahasa Melayu Standard, namun terdapat perbezaan dari aspek sebutannya daripada Bahasa Melayu Standard. Sebahagian besar unsur kata penguat dalam kata adjektif DMK juga didapati unik dan berbeza daripada yang terdapat dalam Bahasa Melayu Standard. Kesimpulannya, penelitian ini diharap menyumbang kepada kajian lanjut tentang kata adjektif DMK pada masa akan datang.

Kata Kunci: Bahasa Melayu; dialek Melayu Kedah; kata adjektif; kata penguat; Padang Terap

ADJECTIVES IN KEDAH MALAY DIALECT: A PRELIMINARY DESCRIPTION

ABSTRACT

Kedah Malay dialect (DMK), like other Malay dialects, has its own linguistic characteristics in terms of phonology, morphology, syntax and semantics. Each of these characteristics represents the uniqueness of DMK and its language community. In relation to this, this paper

aims to discuss one of the linguistic features in DMK, through the description of adjectival aspects. As a preliminary study, this discussion will focus on the description of the types of adjectives in DMK and the characteristics of amplifier words that appear in DMK adjectives. For this purpose, a field study was conducted in one of the villages located in Padang Terap district, Kedah. Data were collected through the method of informal interviews and recordings, involving five native speakers based on NORM/F criteria. The data obtained were analyzed descriptively in accordance with the research objectives. The results of this study have found 19 categories of adjectives contained in DMK. Each category of adjectives is used in various domains of daily life of DMK speakers. Furthermore, the results of this study found 67 elements of amplifier words that appear with adjectives in DMK. The amplifier words appear after the DMK adjective. Overall, although the types of adjectives in DMK have many similarities with Standard Malay, there are differences in terms of pronunciation from Standard Malay. Most of the amplifier word elements in DMK adjectives are unique and different from those found in Standard Malay. In conclusion, this study is expected to contribute to further research on DMK adjectives in the future.

Keywords: Malay language; Kedah Malay dialect; adjectives; amplifiers; Padang Terap

PENGENALAN

Kedah merupakan salah satu daripada 14 negeri di Malaysia yang terletak di sebelah utara Semenanjung Malaysia. Kedah yang dikenali juga sebagai negeri ‘Jelapang Padi’, dari segi geografinya bersebelahan dengan negeri Perlis dan bersempadan dengan bahagian selatan wilayah antarabangsa Thailand iaitu Satun, Songkhla dan Yala. Dari segi linguistik, dialek Melayu Kedah tergolong di bawah dialek Utara, iaitu dialek yang dituturkan di bahagian utara Semenanjung Malaysia, khususnya di negeri Kedah, Pulau Pinang, Perlis dan Perak Utara. Di Perak, dialek Melayu Kedah dituturkan di kawasan Taiping hingga ke utaranya (Nur Habibah et al., 2021). Walaupun dialek Utara meliputi keempat-empat negeri tersebut, namun dialek ini lazimnya dinamakan sebagai ‘dialek Melayu Kedah’, kerana Kedah merupakan kawasan yang terluas yang mempunyai kumpulan penutur dialek tersebut. Selain dialek Melayu, terdapat juga dialek yang lain dituturkan di beberapa kawasan di Kedah iaitu dialek Patani, seperti di daerah Sik, Mahang, Kupang dan Baling (Nur Habibah et al., 2023). Sementara itu, Asmah (2015) membahagikan dialek Kedah kepada beberapa subdialek yang terdiri daripada subdialek Perlis-Langkawi, Kedah Persisiran, Kedah Utara, dan termasuklah Pulau Pinang. Dari segi pembahagian daerah, Kedah terdiri daripada 12 daerah iaitu Langkawi, Kubang Pasu, Padang Terap, Alor Setar, Pokok Sena, Pendang, Yan, Kuala Muda, Sik, Bandar Baharu, Kulim dan Baling (Mashetoh et al., 2020). Daripada beberapa daerah ini, Padang Terap merupakan daerah ketiga terbesar di Kedah dan bersempadan dengan negara Thailand. Perbezaan yang terdapat di dalam subdialek-subdialek di daerah Padang Terap merupakan keunikan yang paling menonjol di kawasan ini. Kawasan ini telah dihuni sejak zaman dahulu dan menjadi kawasan penempatan awal menerusi kampung-kampung yang wujud di pesisir sungai yang menjadi laluan utama pada ketika itu. Dialek yang digunakan di beberapa kawasan di daerah Padang Terap pula bukan semuanya dalam dialek Kedah Persisiran, memandangkan sesetengah masyarakat di daerah Padang Terap yang menggunakan dialek Kedah Utara. Sehubungan dengan itu, makalah ini akan bertujuan untuk membincangkan salah satu aspek dalam dialek Melayu Kedah, dengan meneroka ciri morfologi dialek ini di salah satu kampung di daerah Padang Terap, Kedah.

SOROTAN KOSA ILMU

Malaysia bukan sahaja terkenal dengan kepelbagaian budaya masyarakatnya, malah juga unik dari aspek linguistiknya. Di Semenanjung Malaysia misalnya, terdapat lebih daripada lima jenis dialek utama yang antara lainnya merangkumi dialek Melayu Kedah, Perak, Selangor, Negeri Sembilan, Melaka, Johor, Pahang, Kelantan, dan Terengganu (Shahidi A. H. et al., 2019). Kepelbagaian dialek ini menggiatkan penyelidikan ke atas dialek-dialek Melayu, sama ada kajian yang bersifat sinkronik, mahupun kajian yang bersifat diakronik, misalnya menerusi dialektologi bandingan, yang melibatkan aspek historis dan geografi sesuatu dialek (Nurul Shuhada et al., 2023). Dialek Melayu Kedah (DMK) juga tidak ketinggalan menjadi tumpuan para pengkaji, termasuklah kajian yang meliputi bidang fonetik, dialektologi, morfologi, sosiolinguistik dan juga pragmatik.

Shahidi et al. (2020) misalnya meneliti DMK dalam konteks bidang fonetik. Dengan menggunakan pendekatan fonetik akustik, kajian ini memfokuskan penelitian tentang perbezaan akustik bagi bunyi plosif bilabial yang wujud dalam DMK. Berdasarkan kaedah analisis spektograf, ciri-ciri akustik bunyi plosif yang dituturkan oleh penutur dialek Kedah, dapatan kajian tersebut menunjukkan bahawa dialek Kedah tergolong dalam kelompok bahasa yang memiliki sistem bunyi plosif Penyuaran Tertunda Singkat (SVL) vs. Penyuaran Awal (VLd), iaitu sama seperti bunyi bahasa Melayu Standard. Selain itu, kajian ini turut mengesahkan bahawa beberapa isyarat akustik lain yang mampu untuk menyerlahkan bunyi plosif dalam dialek Kedah iaitu Penyuaran Sewaktu Sekatan dan Tempoh Sekatan. Keseluruhannya, analisis akustik dalam kajian tersebut menunjukkan bahawa dialek Kedah dan Bahasa Melayu Standard tidak mempunyai perbezaan ketara pada bunyi plosif bilabial bersuara atau tidak bersuara, walaupun masih menampakkan sedikit perbezaan pada nilai Masa Mula Suara (VOT). Kajian akustik bunyi plosif ini mempunyai implikasi yang signifikan ke atas aspek penguasaan sebutan varian standard dan non-standard.

Kajian oleh Mohd Tarmizi dan Muhammad Kharilanwar (2021), memfokuskan variasi dialek yang dituturkan kawasan pedalaman di daerah Baling, Kedah. Kajian mereka bertujuan untuk mendeskripsikan sistem fonologi dialek Melayu Baling dengan tumpuan terhadap pemerian fonem dan analisis beberapa ciri fonologi dialek ini. Hasil kajian tersebut menjelaskan bahawa dialek Baling wajar dianggap sebagai dialek tersendiri yang memerlukan pengelompokan baharu dan tidak hanya sekadar dikelompokkan di bawah subdialek Melayu Kedah. Hal ini berlandaskan bukti data-data fonologi dialek Baling, seperti kewujudan konsonan [ɣ], penyatuan nasal BMP *-am kepada [-an], penyatuan diftong BMP *-aw dan *-ay kepada [ɔ], dan pengekalanan BMP *ɣ di awal dan di antara vokal serta penggugurannya di akhir yang mengubah nilai vokal sebelumnya. Para pengkaji ini, menyimpulkan bahawa penemuan kajian mereka berbeza dengan perspektif umum tentang pengelompokan dialek Melayu Semenanjung yang masih melihat kewujudan dialek tersendiri dalam sesebuah negeri, yang dianggap sebagai “subdialek” kepada dialek negeri berkenaan.

Seterusnya kajian oleh Yusniza, Hishamuddin dan Faizah (2020), menyelusuri perkembangan ungkapan darjah penghabisan yang hadir bersama kata adjektif dalam DMK. Kajian ini melibatkan soal selidik ke atas 20 orang penutur natif DMK, dengan memfokuskan padanan yang bersesuaian dengan ungkapan darjah penghabisan bagi kata adjektif DMK. Hasil kajian ini mendapati bahawa selaras dengan perkembangan bahasa yang sentiasa bersifat dinamik, DMK juga didapati turut mengalami perubahan dari aspek kosa kata, khususnya ungkapan darjah penghabisan yang hadir bersama kata adjektif. Perubahan ini, dikatakan berlaku akibat daripada pengaruh media yang mendominasi kehidupan masyarakat, khususnya golongan remaja. Dengan kata lain, terdapat perubahan penggunaan ungkapan darjah penghabisan bagi kata adjektif DMK, dalam kalangan golongan muda berbanding dengan

golongan penutur dewasa DMK.

Mashetoh et al. (2021) menjalankan kajian untuk mengenal pasti pengkonsepsian kosa kata, kata adjektif dalam kalangan penutur DMK. Kajian ini melibatkan 35 orang penutur DMK yang berumur dalam lingkungan 19-45 tahun dan berasal dari tiga kawasan geografi yang berbeza, iaitu Kedah Utara, Kedah Tengah dan Kedah Selatan. Dalam kajian ini, penutur diminta memberikan definisi 30 leksikal kata adjektif DMK yang telah dikenal pasti, berdasarkan pengetahuan dan pemahaman mereka. Dapatan kajian tersebut menunjukkan bahawa majoriti responden mengkonsepsikan leksikal kata adjektif DMK dengan definisi yang sama hampir sama dengan makna dan konsep seperti yang terkandung dalam Kamus Dewan. Walau bagaimanapun, terdapat juga responden yang memberikan pemahaman yang berbeza tentang data kosa kata, kata adjektif DMK. Kajian tersebut menyimpulkan bahawa penutur DMK masih mengekalkan identiti kenegerian mereka berhubung pemahaman kosa kata atau leksikal kata adjektif DMK yang dikaji.

Nur Husnina (2022), mengkaji unsur-unsur kesalingfahaman dalam DMK, antara generasi tua dan generasi muda, dalam komunikasi atau pergaulan seharian mereka. Kajian yang bertempat di kampung Sungai Udang Yan, Kedah ini, melibatkan temu bual dengan lima orang responden dan 98 orang responden untuk menjawab soal selidik. Dapatan kajian tersebut menunjukkan bahawa terdapat beberapa perbezaan penggunaan DMK, antara generasi tua dan generasi muda di kawasan kajian yang dikaji. Hal ini terutamanya dari aspek kosa kata, sebutan dan juga tatabahasa.

Walaupun terdapat beberapa perbezaan tersebut, pengkaji ini mendapati bahawa masih wujud unsur kesalingfahaman dalam interaksi atau komunikasi antara kedua-dua generasi ini. Hasil dapatan kajian ini juga menunjukkan bahawa penutur DMK di kawasan kajian, menganggap bahawa penggunaan DMK masih relevan dan penggunaannya dianggap sebagai satu budaya berbahasa yang harus dipertahankan sebagai identiti masyarakat Kedah.

Nurmiza Zulaikha et al. (2023), telah menjalankan satu kajian kes tentang pengaruh dialek Kedah terhadap kemahiran berbahasa pelajar Program Ijazah Sarjana Muda Perguruan (PISMP), yang berasal dari Kedah. Secara khusus kajian tersebut bertujuan untuk mengenal pasti pengaruh DMK terhadap fonetik dan penggunaan leksikal dalam kalangan pelajar PISMP. Hasil kajian tersebut menunjukkan bahawa rakan sebaya, keluarga, dan persekitaran merupakan faktor utama yang mendorong responden menggunakan dialek Kedah. Dari aspek fonologi, pengaruh DMK dikenal pasti dalam sebutan vokal dan konsonan, yang melibatkan proses pengguguran, penggantian, perubahan dan pendiftongan. Pengaruh DMK juga dikesan dalam penggunaan leksikal kata tanya DMK. Antara contoh leksikal kata tanya DMK yang mempengaruhi penggunaan bahasa responden ialah *awat* (kenapa), *apadia* (apa) dan *cemana* (bagaimana).

Keseluruhannya, beberapa kajian terdahulu tentang DMK telah meneliti dan mendeskripsikan aspek fonetik, dialektologi, morfologi, pragmatik dan sosiolinguistik DMK. Penelitian terdahulu juga meliputi kawasan tertentu misalnya daerah Baling, daerah Yan dan ada yang melibatkan melibatkan penutur DMK secara umum, tanpa menetapkan kawasan kajian yang tertentu. Selain itu, terdapat juga penelitian terdahulu yang mengkaji DMK dalam konteks penguasaan bahasa, perubahan bahasa dan tahap pemahaman bahasa. Walaupun telah ada kajian-kajian terdahulu yang mengkaji DMK, namun kajian yang dijalankan ini bertujuan untuk memfokuskan aspek morfo-sintaksis DMK, menerusi penelitian terhadap kata dan frasa adjektif dalam dialek ini. Tambahan pula, kajian ini menggunakan data DMK yang bersumberkan penutur natif DMK yang menetap di salah satu kawasan kajian yang belum pernah dikaji dalam kajian-kajian terdahulu, iaitu kampung Bukit Buluh di daerah Padang Terap. Justeru, kajian ini berusaha meneroka DMK, menerusi penelitian terhadap kata adjektifnya.

OBJEKTIF KAJIAN

Berdasarkan Tatabahasa Dewan (Nik Safah et al., 2008), kata adjektif atau kata sifat merupakan kategori kata yang menjadi unsur inti dalam frasa adjektif dan boleh menjadi penerang kepada kata nama, kata kerja mahupun kata adjektif. Kata adjektif berfungsi menerangkan keadaan atau sifat sesuatu perkara atau nama, yang berunsur (1) pancaindera (manis, busuk, halus dll), (2) ukuran (panjang, pendek, tinggi dll), (3) cara (lambat, cepat, laju dll), (4) perasaan (sedih, gembira, takut dll), (5) warna (merah, biru, putih dll), (6) jarak (jauh, dekat, hampir dll), (7) bentuk (bulat, bundar, leper dll), (8) waktu (awal, lambat, lewat dll) dan (9) sifat (berani, cantik, kuat dan lain-lain). Sehubungan itu, dialek Kedah yang merupakan antara dialek yang unik, bukan sahaja daripada sudut fonologi, morfologi dan sintaksisnya, malah juga dari aspek sosiopragmatiknya (Nurul Shahida et al., 2016). Sebagai contoh dalam penelitian Asmah (1993), sejumlah kosa kata dari dialek Kedah telah dibandingkan dengan subdialek lain seperti subdialek Pesisir Kedah, Kedah Utara, Perlis-Langkawi serta perbandingan dengan Patani Baling dan Patani Sik (Norhashimah et al., 2019). Hal ini sekaligus menunjukkan bahawa setiap ciri dialek Melayu Kedah mewakili keunikan di setiap kawasan penutur yang berbeza. Berlandaskan hal tersebut, makalah ini bertujuan untuk membincangkan salah satu aspek linguistik dalam dialek ini, di salah satu daerah di Kedah, menerusi pemerian tentang kata adjektifnya. Sebagai satu penelitian yang bersifat awal, perbincangan ini akan memfokuskan pendeskripsian tentang jenis kata adjektif dialek Melayu Kedah dan juga meneroka penggunaan kata penguat yang hadir bersama kata adjektif dalam dialek tersebut.


METODOLOGI

Pengumpulan data kata adjektif DMK untuk kajian ini, melibatkan penyelidikan lapangan di salah sebuah kampung yang terletak di Mukim Pedu, Kuala Nerang, daerah Padang Terap, iaitu kampung Bukit Buluh. Jarak kampung Bukit Buluh dari kota Alor Setar kira-kira 45 kilometer. Dari segi infrastruktur, kampung ini boleh diakses dengan jalan raya, mempunyai sistem bekalan air dan kemudahan elektrik. Anggaran jumlah penduduk kampung ini adalah sekitar 200 orang dan majoritinya ialah orang Melayu. Antara aktiviti ekonomi yang dijalankan oleh penduduk kampung ialah bersawah padi, berniaga, berkebun, menjadi tukang rumah dan ada yang bekerja di sektor awam seperti guru, jururawat dan polis. Kemudahan sekolah rendah dan sekolah menengah yang terdekat dengan lokasi kampung Bukit Buluh ialah Sk. Pedu dan SMK. Pedu. Justifikasi mengapa pengkaji memilih kampung Bukit Buluh sebagai lokasi kajian ini adalah kerana kampung ini merupakan kawasan yang dianggap relik, yang masih belum banyak terdedah kepada pengaruh luar dari segi bahasanya. Kawasan relik dimaksudkan sebagai kawasan yang menunjukkan ciri linguistik yang konservatif (Mohd Tarmizi, 2022). Justeru dengan lokasi kampung Bukit Buluh yang terpencil, terletak di pinggir hutan, jumlah penduduk yang kecil dan belum mengalami pembangunan drastik, memungkinkan penggunaan dialek di kampung ini masih mengekalkan ciri-ciri keasliannya. Dengan kata lain, DMK yang terdapat di kawasan kajian ini belum dipengaruhi oleh bentuk percakapan atau bahasa dari luar. Atas faktor inilah pengkaji memilih kampung Bukit Buluh sebagai lokasi kajian, kerana dialek yang dituturkan di kampung ini masih terpelihara ketulenannya dengan baik.

Untuk tujuan pengumpulan data kata adjektif DMK, pengkaji telah memilih lima orang informan berdasarkan ciri-ciri atau kriteria NORM (*non-mobile, older, rural, male speakers*). Kriteria NORM adalah berdasarkan Chambers & Trudgill (1998), yang merujuk pada informan yang tidak berpindah randah atau kekal menetap di sesebuah kawasan, keutamaan kepada informan yang berumur tua, menetap di kawasan kampung dan penutur lelaki. Walau bagaimanapun dalam kajian ini, pengkaji turut memilih informan dalam kalangan lelaki dan

wanita. Hal ini bertitik tolak daripada pertimbangan bahawa informan wanita juga turut menyumbang kepada sumber data, memandangkan kaum lelaki berkemungkinan cenderung menerima pendedahan luar yang lebih berbanding kaum wanita. Justeru, dalam kajian ini pengkaji telah memilih tiga informan lelaki dan dua informan wanita. Informan tersebut berumur dalam lingkungan 40 hingga 60 tahun. Kesemua informan tersebut merupakan anak jati kampung Bukit Buluh dan dipilih dalam kalangan mereka yang tidak pernah bermigrasi ke kawasan luar kampung lain dalam tempoh yang agak lama. Kaedah pengumpulan data adalah melibatkan teknik temu bual secara informal, rakaman dan catatan. Temu bual secara informal dilakukan antara pengkaji dengan informan bagi tujuan untuk mendapatkan info leksikon atau pembendaharaan kata adjektif daripada penutur DMK. Setiap perbualan direkodkan menerusi rakaman audio dan juga catatan, untuk tujuan transkripsi data dan penyemakan. Data yang diperoleh, ditranskripsikan dan dianalisis selaras dengan objektif kajian yang telah ditetapkan. Peta 1 yang berikut, menunjukkan lokasi kampung Bukit Buluh, di mukim Pedu, Kuala Nerang, Padang Terap, Kedah.

PETA 1. Kampung Bukit Buluh, Daerah Padang Terap



(Sumber : Google Maps, 2023)

ANALISIS DAN PERBINCANGAN

Berdasarkan Tatabahasa Dewan (Nik Safiah et al., 2008), kata adjektif atau kata sifat merupakan kategori kata yang menjadi unsur inti dalam frasa adjektif dan boleh menjadi penerang kepada kata nama, kata kerja mahupun kata adjektif. Kata adjektif berfungsi menerangkan keadaan atau sifat sesuatu perkara atau nama, yang berunsur (1) pancaindera (manis, busuk, halus dll), (2) ukuran (panjang, pendek, tinggi dll), (3) cara (lambat, cepat, laju dll), (4) perasaan (sedih, gembira, takut dll), (5) warna (merah, biru, putih dll), (6) jarak (jauh, dekat, hampir dll), (7) bentuk (bulat, bundar, leper dll), (8) waktu (awal, lambat, lewat dll) dan (9) sifat (berani, cantik, kuat dll). Sehubungan itu, bahagian ini akan membincangkan dapatan kajian berkaitan frasa adjektif DMK. Perbincangan ini dibahagikan kepada dua bahagian iaitu pemerian tentang (i) jenis kata adjektif dalam DMK dan (ii) perbincangan tentang frasa adjektif DMK.

Jenis Kata Adjektif dalam Dialek Melayu Kedah

Berdasarkan hasil kajian lapangan di kampung Bukit Buluh, daerah Padang Terap, pengkaji telah menemukan sembilan jenis kata adjektif DMK, iaitu kata adjektif pancaindera, kata adjektif ukuran, kata adjektif emosi, kata adjektif waktu, kata adjektif warna, kata adjektif sifat, kata adjektif bentuk, kata adjektif suhu dan kata adjektif taraf. Setiap jenis kata adjektif tersebut merangkumi penggunaannya dalam pelbagai kegiatan sehari-hari penutur DMK, misalnya apabila membincangkan tentang keadaan cuaca semasa atau perubahan cuaca, menggambarkan keadaan sifat dan perasaan seseorang, menjelaskan konsep yang ditanggapi oleh panca indera, mendeskripsikan unsur warna dalam pelbagai aktiviti seharian, mendeskripsikan bentuk objek atau sesuatu benda, menjelaskan konsep masa dan seumpamanya. Jadual 1 hingga 9 yang berikutnya, menunjukkan contoh-contoh setiap jenis kata adjektif dalam DMK.

JADUAL 1. Kata Adjektif Pancaindera dalam DMK

No.	Pancaidera	DMK	BM Standard
1	rasa	taway, maneh, masen, masam, pe?, pədah dan sədap	tawar, manis, masin, masam, pahit, pedas, sedap
2	pandang	b ^w uyə?, tʃəme, ^w udəh, tʃəyah, gəlap	buruk, comel, hodoh, gelap, cerah, gelap
3	dengar	hiŋə, di ^v am, k ^w uat	bising, senyap, kuat
4	bau	busu?, hanʃiŋ, haŋe, waji, hanjit, hapa?, hameh	busuk, hancing, hanyir, wangi, hangit, hapak dan hamis
5	sentuh	hal ^w uih, basah, tʃe, pə?at, tump ^w ui, kəyah, liʃeŋ, kasə	halus, basah, cair, pekat, tumpul, keras, licin dan kasar

(Sumber: Kajian Lapangan 2023)

Jadual 1 di atas menunjukkan beberapa contoh kata adjektif pancaindera dalam DMK, iaitu kata yang membawa maksud yang berkaitan dengan konsep rasa, pandang, dengar, bau dan sentuh. KA Kebanyakan kata adjektif pancaindera dapat dijelaskan, difikirkan dan diberikan tanggapan oleh penutur secara subjektif. Sebahagian daripada contoh-contoh kata adjektif pancaindera DMK ini juga mempunyai bunyi sebutan yang berbeza daripada sebutan dalam bahasa Melayu Standard, misalnya perkataan seperti tʃəme (comel), tʃəyah (cerah), tʃe cair dan liʃeŋ (licin) yang mengandungi bunyi afrikatif /tʃ/.

JADUAL 2. Kata Adjektif Ukuran dalam DMK

No.	DMK	BM Standard
1	pandʒan	panjang
2	tingi	tinggi
3	pende?	pendek
4	kəʃi?	kecil
5	bəsə	besar
6	nipeh	nipis
7	təbai	tebal
8	yiŋan	ringan
9	bəyat	berat
10	l ^w uah	luas
11	ketət	ketat

(Sumber: Kajian Lapangan 2023)

Jadual 2 di atas menunjukkan beberapa contoh kata adjektif yang berkaitan dengan konsep ukuran dalam DMK. Kata adjektif yang merujuk kepada ukuran benda hidup/bernyawa atau tidak bernyawa, konkrit atau abstrak. Berdasarkan jadual 2 juga, kata adjektif ukuran dalam DMK didapati mempunyai bunyi sebutan yang berbeza daripada sebutan dalam bahasa Melayu Standard, misalnya kata *bəyat*, *ɣɪn* dan *kəfɪʔ*.

JADUAL 3. Kata Adjektif Emosi dalam DMK

No.	DMK	BM Standard
1	kənan	suka
2	sajaŋ	sayang
3	bəŋfɪ	benci
4	sədəh	sedih
5	takot	takut
6	gəɣən	seram
7	ɣindu	rindu
8	mayah	marah
9	kəfɛwa	kecewa

(Sumber: Kajian Lapangan 2023)

Selanjutnya Jadual 3 di atas menunjukkan beberapa contoh kata adjektif DMK berkaitan emosi. Emosi merujuk kepada perasaan yang muncul dan ada kalanya meluap-luap disebabkan sesuatu perkara atau peristiwa yang berlaku. Kata adjektif jenis ini terdiri daripada perkataan yang membawa konsep perasaan, misalnya perasaan benci, sedih, takut, marah dan seumpamanya.

JADUAL 4: Kata Adjektif Waktu dalam DMK

No.	DMK	BM Standard
1	bayu	baru
2	lama	lama
3	lambat	lambat
4	awai	awal

(Sumber: Kajian Lapangan 2023)

Kata adjektif berkaitan waktu dalam DMK dapat dilihat menerusi Jadual 4. Kata adjektif waktu membawa pengertian berkaitan dengan konsep masa misalnya keadaan lambat, baru, lama dan awal.

JADUAL 5. Kata Adjektif Warna dalam DMK

No.	DMK	BM Standard
1	itam	hitam
2	idʒə	hijau
3	meyəh	merah
4	p ^w uteh	putih
5	k ^w uneŋ	kuning
6	biyu	biru

(Sumber: Kajian Lapangan 2023)

Seterusnya Jadual 5 di atas menunjukkan beberapa contoh kata adjektif berkaitan warna dalam DMK. Kata adjektif warna mewakili konsep makna berkaitan warna-warna yang hadir di sekeliling, sama ada alam sekitar mahupun benda, misalnya putih, hitam, merah, hijau, biru dan seumpamanya. Berdasarkan data dalam jadual 5 tersebut, didapati beberapa kata adjektif waktu dalam DMK mempunyai sebutan yang berbeza daripada sebutan dalam bahasa Melayu Standard, misalnya kata *meyoh* (merah), *idzo* (hijau) dan *biyu* (biru), yang mengandungi bunyi konsonan lelangit lembut bersuara /y/.

JADUAL 6. Kata Adjektif Sikap/Sifat dalam DMK

No.	DMK	BM Standard
1	bodoh	bodoh
2	beyoh	dungu
3	ʃəyadeʔ	bijak
4	dʒahe	jahil
5	kədzam	kejam
6	ðolem	zalim

(Sumber: Kajian Lapangan 2023)

Jadual 6 menunjukkan beberapa contoh kata adjektif yang berkaitan dengan sikap atau sifat dalam DMK, sama ada sikap yang berunsur positif mahupun yang berunsur negatif. Beberapa contoh kata adjektif tersebut ialah kejam, bodoh, bijak dan seumpamanya.

JADUAL 7. Kata Adjektif Bentuk dalam DMK

No.	DMK	BM Standard
1	b ^w ulat	bulat
2	heyot	senget
3	kəmeʔ	kemik
4	bəŋkaʔ	bengkak
5	gəməʔ	gemuk
6	k ^w uyuih	kurus

(Sumber: Kajian Lapangan 2023)

Kata adjektif yang berkaitan dengan konsep bentuk dalam DMK, ditunjukkan dalam Jadual 7. Kata adjektif berkaitan bentuk, memberi keterangan sesuatu bentuk dan lazimnya merujuk kepada ciri benda hidup atau benda yang konkrit, misalnya bulat, senget, gemuk, kurus dan seumpamanya.

JADUAL 8. Kata Adjektif Suhu dalam DMK

No.	DMK	BM Standard
1	panah	panas
2	sədzuʔ	sejuk
3	kəyiŋ	kering
4	haŋat	hangat

(Sumber: Kajian Lapangan 2023)

Jadual 8 di atas menunjukkan beberapa contoh kata adjektif berkaitan suhu dalam DMK.

Kata adjektif suhu adalah kata sifat yang membawa konsep makna sejuk panasnya keadaan alam, benda mahupun fizikal manusia. Keadaan suhu dalam alam sekitar, benda dan fizikal manusia yang dapat diukur menerusi jangka suhu tertentu.

JADUAL 9. Kata Adjektif Taraf dalam DMK

No.	DMK	BM Standard
1	kaja	kaya
2	sənaŋ	senang
3	susəh	susah
4	miskən	miskin

(Sumber: Kajian Lapangan 2023)

Akhir sekali Jadual 9 menunjukkan beberapa contoh kata adjektif yang berkaitan dengan konsep taraf dalam DMK. Penggunaan kata adjektif jenis ini meliputi pendeksripsian tentang konsep taraf seseorang dalam masyarakat, sama ada dari aspek kebendaan misalnya kaya, miskin, mahupun aspek-aspek bukan kebendaan, seperti keadaan susah dan senang.

Keseluruhannya, bahagian ini telah menunjukkan sembilan jenis kata adjektif dalam DMK dan juga contoh-contohnya. Setiap jenis kata adjektif tersebut digunakan dalam pelbagai domain kehidupan sehari-hari masyarakat penutur DMK dikaji, sama ada untuk mendeksripsikan konsep pancaindera, konsep waktu, konsep bentuk, konsep warna, suhu, ukuran, mendeskripsikan emosi, sifat dan taraf. Walaupun dari segi penjenisan kata adjektif DMK didapati hampir sama seperti yang terdapat dalam bahasa Melayu Standard, namun kata adjektif DMK mempunyai keunikannya yang tersendiri. Hal ini khususnya dari aspek bunyi sebutan kebanyakan kata adjektif DMK yang berbeza daripada sebutan kata adjektif yang terdapat dalam bahasa Melayu Standard. Ciri ini juga sekaligus menjadi ciri pembeza utama antara DMK dengan dialek-dialek Melayu yang lain.

Kata Penguat dalam Frasa Adjektif Dialek Melayu Kedah

Frasa adjektif ialah salah satu daripada empat kategori frasa yang utama, selain frasa nama, frasa kerja dan frasa preposisi. Frasa adjektif boleh terdiri daripada hanya satu kata adjektif atau beberapa perkataan yang mengandungi kata adjektif serta unsur keterangan yang lain, misalnya kata bantu atau kata penguat (Nik Safiah et al., 2008). Frasa adjektif berfungsi sebagai predikat ayat, sama ada sebagai penerang frasa kerja mahupun penerang frasa nama. Contoh yang berikut menunjukkan contoh kata adjektif dalam ayat:

- a. Aminah masih *ketakutan* dengan peristiwa ragut tersebut.
- b. Air sungai Padang Terap mengalir *deras*.

Dalam ayat (a) misalnya, kata *ketakutan* merupakan kata adjektif yang menjelaskan frasa nama *Aminah*. Dalam contoh ini, dapat difahami bahawa *Aminah* merupakan seseorang yang mengalami rasa takut atau dalam konteks peranan teta atau peranan maknanya, dikenali juga sebagai ‘pengalami’, iaitu entiti yang mengalami suatu keadaan yang dinyatakan dalam predikat tersebut (Kartini, 2013). Kata bantu *masih* lazimnya boleh muncul mendahului sesuatu kata adjektif, misalnya dalam contoh ayat (a) tersebut. Manakala dalam ayat (b) pula, kata adjektif *deras* menjadi penerang kepada kata kerja *mengalir*. Sementara itu, kata penguat pula merupakan perkataan yang mendahului atau mengikuti sesuatu kata atau frasa misalnya kata/frasa adjektif. Kehadiran kata penguat lazimnya berfungsi untuk menguatkan maksud atau memberi penekanan maksud yang terkandung dalam kata atau frasa adjektif. Kata penguat

bahasa Melayu terbahagi kepada kata penguat hadapan, kata penguat belakang dan kata penguat bebas. Kata penegas seperti *juga* dan *lagi*, boleh hadir bersama kata atau frasa adjektif, untuk memberi penegasan kepada maksud yang berkaitan. Penggunaan unsur kata penguat bagi kata adjektif juga mempunyai tahap, misalnya ungkapan penghabisan menerusi penggunaan kata penguat seperti ‘paling’, ‘sungguh’, ‘amat’ dan seumpamanya (Nur Sufiah & Maslida, 2020). Hubungan antara kata/frasa adjektif dengan unsur-unsur keterangan seperti kata bantu, kata penguat dan kata penegas, dirumuskan menerusi Jadual 10 yang berikut:

JADUAL 10. Frasa Adjektif Bahasa Melayu

No.	Unsur Keterangan		Frasa Adjektif	Unsur Keterangan	
	Kata Bantu	Kata Penguat	Kata Adjektif	Kata Penguat	Kata Penegas
1	-	-	tinggi	-	juga
2	-	sangat	bijak/lambat	-	-
3	-	terlalu	baik	sungguh	-
4	-	-	cantik/indah	sekali/nian	-
5	masih	-	muda/harum	-	lagi
6	-	-	terang/gelap	benar	-
7	-	sangat	tebal/jarang	-	-
8	-	-	berat/ringan	sekali	-
9	-	amat	deras/lebat	sekali	-
10	-	sungguh	merdu	-	-

(Disesuaikan daripada Nik Safiah et al., 2008)

Berdasarkan data kajian yang diperolehi, pengkaji mendapati bahawa kata adjektif dalam DMK diikuti oleh penggunaan unsur kata penguat yang bersifat rencam dan unik. Setiap jenis kata adjektif dalam DMK mempunyai bentuk kata penguatnya yang tersendiri dan bersifat khusus. Justeru dalam perbincangan yang seterusnya ini, akan dihuraikan penggunaan kata penguat yang hadir bersama dengan setiap jenis kata adjektif dalam DMK, berdasarkan Jadual 11 hingga jadual 19 yang berikut.

JADUAL 11: Kata Penguat Pancaindera DMK

No.	DMK	Kata Penguat Belakang	Makna
1	taway	hebiaq/hebe	sangat tawar
2	maneh	piaw/teng/melecas	sangat manis
3	masen	piang	sangat masin
4	masam	piang/berkerut/perit	sangat masam
5	pe?	berdengung	sangat pahit
6	pədah	berapi/nak mampoi/bengang	sangat pedas
7	gəlap	gelita/gelemat	sangat gelap
8	busu?	haring	sangat busuk
9	liʃeŋ	liau	sangat licin
10	kəyah	kong	sangat keras

Jadual 11 di atas menunjukkan unsur kata penguat yang hadir bersama kata adjektif pancaindera dalam DMK. Setiap jenis kata penguat tersebut merupakan kata penguat belakang yang hadir selepas kata adjektif DMK. Kata penguat bagi kata adjektif pancaindera ini berfungsi menekankan lagi makna kata yang berunsur deria rasa seperti tawar, manis, masin,

masam, pahit dan pedas. Penggunaan kata penguat dalam kata adjektif pancaindera DMK ini memberi gambaran tentang tahap atau darjah kemasinan, tahap kepahitan atau kepedasan sesuatu makanan yang dirasai mahupun tahap deria sentuh misalnya darjah kelicinan. Sebagai contoh *maneh piaw*, *pe? bərdənuj*, *masam piaŋ* dan *liŋŋ liau* dalam ayat-ayat yang berikut:

- (1) /ayay sirap tu **maneh piaw**/ (DMK)
Air sirap itu sangat manis. (BMS)
- (2) /**pe? bərdənuj** ayay kəpi hat ade? buat/ (DMK)
Air kopi yang dibuat (oleh) adik sangat pahit. (BMS)
- (3) /yasa buah pəlam itu , / (DMK)
Rasa buah mangga itu sangat masam. (BMS)
- (4) /lantai tu **liŋŋ liau**/ (DMK)
Lantai itu sangat licin. (BMS)

JADUAL 12. Kata Penguat Ukuran DMK

No.	DMK	Kata Penguat Belakang	Makna
1	l ^w uah	terbentang/terentang/gong	sangat luas
2	ketət	petot	sangat rendah
3	nipeh	melayang	sangat nipis
4	tingi	melayut/lampai/renjong/melangit	sangat tinggi
5	kəŋfi?	konet/kenit/mone	sangat kecil
6	bəso	gajah/gedabak/gabai/ragam/gaban	sangat besar

Jadual 12 di atas menunjukkan beberapa jenis kata penguat yang hadir bersama kata adjektif ukuran dalam DMK. Kata penguat ukuran dalam DMK berfungsi menguatkan lagi kesan gambaran ukuran atau bentuk sesuatu benda yang dimaksudkan. Kata penguat ukuran dalam DMK ini turut memperlihatkan konsep perbandingan misalnya besar dari segi saiz seperti gajah, nipis sehingga boleh melayang, tinggi yang amat sangat sehingga seakan-akan sampai ke langit, terlalu kecil saiz tidak seperti yang selazimnya dan sebagainya. Beberapa contoh ayat yang mengandungi unsur kata penguat bagi kata adjektif ukuran dalam DMK, adalah seperti yang berikut:

- (5) mənaya aloy setay tu **tingi məlayut**/ (DMK)
Menara Alor Setar itu sangat tinggi. (BMS)
- (6) /badzu hat asmaq pakai **nipeh məlayaŋ**/ (DMK)
Baju yang dipakai oleh Asmaq sangat nipis. (BMS)
- (7) /badzu ha? ayah bəli untə? mak **kəŋfi? konet**/. (DMK)
Baju yang dibeli mak untuk ayah sangat kecil. (BMS)

JADUAL 13. Kata Penguat Emosi DMK

No.	DMK	Kata Penguat Belakang	Makna
1	kənan	gila	sangat suka
2	sajaŋ	gila	sangat sayang
3	bəŋfi	gila	sangat benci

4	sədəh	nak mampoih	sangat sedih
5	takot	nak mampoih	sangat takut
6	kəfəwa	gila	sangat seram

Seterusnya Jadual 13 pula menunjukkan unsur kata penguat yang hadir bersama kata adjektif emosi dalam DMK. Kata adjektif emosi dalam DMK dapat diperkuatkan darjah atau tahapnya dengan menggunakan kata penguat seperti *gila* dan frasa *nak mampoih/nak mampus/mati*. Kata *gila* lazimnya menggambarkan tahap perasaan dari segi kesangatan, misalnya sangat/terlalu suka atau sangat/terlalu benci/sayang/kecewa terhadap sesuatu perkara atau seseorang. Manakala frasa *nak mampoih/nak mampus/nak mati* pula menggambarkan tahap atau darjah perasaan yang sangat tinggi. Misalnya perasaan terlalu takut kepada hantu/seseorang/benda, mahupun perasaan sedih yang terlalu berat yang sedang ditanggung oleh seseorang. Contoh-contoh yang berikut menunjukkan penggunaan kedua-dua jenis kata penguat bagi kata adjektif emosi dalam DMK:

- (8) /aiman takot **nak mampoih** səbab tak dak əyag kat yumah dia/ (DMK)
Aiman sangat takut kerana tiada orang di rumahnya. (BMS)
- (9) /awatif kəfəwa **gila** dənən pəyənəi balak dia tu/. (DMK)
Awatif sangat kecewa dengan sikap teman lelakinya itu. (BMS)

JADUAL 14. Kata Penguat Waktu DMK

No.	DMK	Kata Penguat Belakang	Makna
1	bayu	merelit	sangat baru
2	lama	berkarat	sangat lama
3	lambat	mekngot/makngot/terkemut-kemut	sangat lambat

Selanjutnya Jadual 14 di atas menunjukkan unsur kata penguat yang hadir bersama kata adjektif waktu dalam DMK. Kata penguat yang hadir bersama kata adjektif waktu ini memperlihatkan darjah perbandingan masa atau keadaan misalnya sangat baru, sangat lama dan sangat lambat. Kata *merelit* bermaksud berkilat atau berkilau. Justeru merelit dalam contoh 1 tersebut menunjukkan keadaan baharu yang berkilat atau berkilau. Kata *berkarat* pula menunjukkan keadaan benda yang sudah lama sehingga mempunyai karat. Dalam konteks penggunaannya dalam kata adjektif DMK, kata *berkarat* memberikan gambaran keadaan fizikal benda yang sudah terlalu lama, terlalu buruk atau usang. Contoh-contoh ayat yang berikut menunjukkan penggunaan kata penguat bagi kata adjektif waktu dalam DMK:

- (10)/alif tola? pi yədzə dənən yeta **bayu məyəlīt** tu /. (DMK)
Alif bertolak pergi kerja dengan kereta baharu itu. (BMS)
- (11)/yeta tu dah **lama bəkayət**/ (DMK)
Kereta tu sudah sangat lama. (BMS)
- (12)/said mai kəlah hayi ni **lambat mekət**/ (DMK)
Said datang ke sekolah hari ini sangat lambat. (BMS)

JADUAL 15. Kata Penguat Warna DMK

No.	DMK	Kata Penguat Belakang	Makna
1	itam	melegam/merelit	sangat hitam
2	idʒə	menerang/merengau	sangat hijau
3	meyəh	ang-ang	sangat merah
4	p ^w uteh	melepak/serelah	sangat putih
5	k ^w uney	merengau/berjahang	sangat kuning
6	biyu	merengau	sangat biru

Jadual 15 di atas menunjukkan unsur kata penguat yang hadir bersama kata adjektif warna dalam DMK. Kata penguat warna dalam DMK berfungsi memberi kesan makna yang lebih jelas atau kuat terhadap gambaran warna sesuatu benda yang dirujuk atau dimaksudkan. Sebagai contoh isi buah durian yang berwarna kuning digandingkan dengan kata penguat *merengau*, menambahkan kesan makna warna kuning yang sangat pekat gelap menyerlah. Begitu juga warna merah yang disertai dengan kata penguat *ang-ang* menunjukkan kesan gambaran warna merah menyala seperti darah. Selain itu, terdapat kata penguat yang boleh hadir hanya dengan jenis warna yang tertentu. Contohnya kata penguat *ang-ang* hanya boleh muncul bersama dengan kata adjektif merah, dan tidak boleh hadir bersama jenis warna yang lain. Kebanyakan kata penguat warna dalam DMK juga berbentuk kata terbitan yang mengandungi imbuhan *meN-* misalnya *menerang*, *melegam* dan *merengau*. Beberapa contoh ayat yang berikut menunjukkan penggunaan kata penguat bagi kata adjektif warna dalam DMK:

(13)/isi duyian itu **k^wuney mərəŋau/** (DMK)

Isi durian itu sangat kuning. (BMS)

(14)warna yumah bayu patih **idʒə mənəraŋ/** (DMK)

Warna rumah baru Fatih sangat hijau. (BMS)

(15)/badzu awani pakai **meyəh ang-ang/**(DMK)

Baju yang dipakai Awani sangat merah. (BMS)

JADUAL 16. Kata Penguat Sifat DMK

No.	DMK	Kata Penguat Belakang	Makna
1	maleh	nak mampoih	sangat malas
2	kədəʔut	taik hidung masin/piang/hangit	sangat kedekut
3	beʔ	gila	sangat baik
4	luyuih	bendul	sangat lurus
5	gatai	merela/merenyam	sangat gatal
6	b ^w uaih	nak mampoih	sangat nakal

Jadual 16 di atas memaparkan unsur kata penguat yang hadir bersama kata adjektif sifat dalam DMK. Kata penguat sifat ini berfungsi memberi penegasan atau penekanan terhadap makna yang didukung oleh sesuatu kata adjektif tersebut. Sebagai contoh, konsep nakal dalam DMK yang diwakili oleh kata *b^wuaih* (buas), dapat ditambah dengan unsur kata/frasa penguat *nak mampoih*, bagi menunjukkan tahap kenakalan seseorang yang dimaksudkan, sebagai sangat/terlalu nakal. Bagi menegaskan tentang keadaan atau sifat kedekut seseorang pula, DMK mempunyai ungkapan perbandingan yang dapat menguatkan maksud tersebut misalnya melalui frasa/kata *taik hidung masin/piang/hangit*. Selanjutnya kata adjektif *gatal* dalam DMK

dapat hadir bersama dengan kata penguat *merenyam*, yang menggambarkan kesan makna galak yang berlebihan. Contoh-contoh ayat yang berikut menunjukkan penggunaan kata penguat bagi kata adjektif sifat dalam DMK:

- (16)/adik aku **b^wuaih nak mampoih** di sekolah/ (DMK)
Adik saya sangat nakal di sekolah. (BMS)
- (17) /wawa **kədə?ut taik hiduŋ masin** səbab dia tak pənah landʒa makan (DMK)
Wawa sangat kedekut kerana dia tidak pernah belanja makan. (BMS)
- (18) /dia **gatai məyəla** masa sembaŋ/ (DMK)
Dia sangat gatal semasa berbual. (BMS)

JADUAL 17. Kata Penguat Bentuk DMK

No.	DMK	Kata Penguat Belakang	Makna
1	b ^w ulat	montek/buntal/tergolek	sangat bulat
2	həyət	gila	sangat senget
3	kəmə?	gila	sangat kemik
4	bəŋka?	gila	sangat bengkak
5	gəmə?	gedempol/gedebab	sangat gemuk
6	k ^w uyuih	kering/kedekiang/melidi	sangat kurus

Selanjutnya Jadual 17 di atas memaparkan unsur kata penguat yang hadir bersama kata adjektif bentuk dalam DMK. Kata penguat bentuk ini berfungsi menambahkan lagi makna kata adjektif yang dimaksudkan, dari segi keadaan bentuk benda atau seseorang misalnya keadaan badan yang kurus, gemuk, atau bentuk benda yang bulat, kemik dan seumpamanya. Kata adjektif *bulat* misalnya, diikuti oleh kata penguat *buntal*, yang dapat memberikan satu perbandingan yang sama dengan bentuk bulat. Begitu juga dengan kata penguat *tergolek*, berfungsi memberikan satu gambaran bahawa benda tersebut sangat bulat bentuknya, sehingga mampu bergolek atau tergolek. Sementara itu kata penguat *gila*, berfungsi menunjukkan kesan tahap yang sangat tinggi dari segi keadaan bentuk sesuatu benda yang kemek, senget atau bengkak. Kata penguat *gedempol/gedebab* pula dikhaskan untuk menambah deskripsi tentang bentuk fizikal seseorang yang gemuk berisi. Sementara kata penguat *kedekiang/melidi* pula berfungsi merujuk keadaan fizikal atau badan seseorang yang sangat kurus/tidak berisi/sehingga kelihatan tulang. Beberapa contoh penggunaan kata penguat bentuk dalam frasa adjektif DMK adalah seperti dalam ayat-ayat yang berikut:

- (19)/haŋ **gəmə? gədempəi** lani/ (DMK)
Awak sangat gemuk sekarang. (BMS)
- (20)/kueh hat ma? buwat **b^wulat məntek**/ (DMK)
Kuih yang dibuat mak sangat bulat. (BMS)
- (21) /əyən tu **k^wuyuih kəyīŋ** səbab isap dadah/ (DMK)
Orang itu sangat kurus kerana menghisap dadah. (BMS)

JADUAL 18. Kata Penguat Suhu DMK

No.	DMK	Kata Penguat Belakang	Makna
1	panah	lit-lit/terik/merembang	sangat panas

2	səɖzuʔ	gedi/bedi	sangat sejuk
3	kəyɪŋ	gila	sangat kering
4	haŋat	nak mampoih	sangat hangat

Jadual 18 di atas menunjukkan unsur kata penguat yang hadir bersama kata adjektif suhu dalam DMK. Kata penguat *gedi* dan *lit-lit*, masing-masing merupakan kata penguat yang berfungsi memberi kesan makna suhu yang melampau. Frasa *panah lit-lit* dalam DMK misalnya menunjukkan gambaran keadaan cuaca panas yang sangat terik, berbahang atau berkuap. Sementara itu, *sejuk gedi* pula menunjukkan makna keadaan sejuk yang sangat sejuk, misalnya air telaga atau air perigi yang terasa sangat sejuk, khususnya pada waktu awal pagi hari. Beberapa contoh ayat yang berikut, menunjukkan penggunaan kata penguat bagi kata adjektif suhu dalam DMK:

(22)/ayay təlaga tu **səɖzuʔ gədi**/ (DMK)
Air telaga itu sangat sejuk. (BMS)

(23)/fuca hayi ni **haŋat nak mampoih**/ (DMK)
Cuaca pada hari ini amat hangat. (BMS)

(24) /fuw aŋə ayi ni **panah lit-lit**/ (DMK)
Cuaca hari ini sangat panas. (BMS)

JADUAL 19. Kata Penguat Taraf DMK

No.	DMK	Kata Penguat Belakang	Makna
1	kaja	raya	sangat kaya
2	sənaŋ	gila	sangat senang
3	susəh	nak mampoih	sangat susah
4	miskən	gila	sangat miskin

Akhir sekali Jadual 19 menunjukkan unsur kata penguat yang hadir bersama kata adjektif taraf dalam DMK. Kata adjektif DMK yang mewakili konsep taraf hidup seseorang sama ada kaya, miskin, susah mahupun senang dapat ditambahkan dengan kata penguat seperti *raya*, *gila* dan *nak mampoih*. Kata penguat tersebut berfungsi memberi penekanan tentang tahap/darjah kesenangan/kekayaan atau kesusahan/kemiskinan hidup seseorang, yang dimaksudkan. Contoh-contoh ayat yang berikut menunjukkan penggunaan kata penguat bagi kata adjektif taraf dalam DMK:

(25) /pak salim **sənaŋ gila** lani səbab anak dia səmua dah yəɖzə/. (DMK)
Pak Salim sangat senang sekarang kerana semua anaknya sudah berkerja.
(BMS)

(26) /əyən tuw a laki tu **susəh nak mampoih**/ (DMK)
Orang tua lelaki itu sangat susah. (BMS)

(26) /kəluarga tu **miskən gila**/ (DMK)
Keluarga itu sangat miskin. (BMS)

Keseluruhan perbincangan dalam bahagian ini telah meneliti jenis-jenis kata penguat yang hadir bersama setiap jenis kata adjektif yang terdapat dalam DMK. Berdasarkan hasil kajian, sejumlah 67 jenis kata penguat ditemui dalam frasa adjektif DMK. Sebahagian besar

kata penguat tersebut merupakan kata penguat belakang, iaitu kata penguat yang hadir selepas kata adjektif DMK. Kehadiran kata penguat ini berfungsi untuk menguatkan maksud ataupun memberi penekanan terhadap makna yang terkandung dalam sesuatu kata atau frasa adjektif DMK tersebut. Kata penguat dalam frasa adjektif DMK didapati unik, bukan sahaja dari segi sebutannya yang berbeza daripada bahasa Melayu Standard, malah kebanyakan kata penguat tersebut tidak terdapat dalam bahasa Melayu Standard.

KESIMPULAN

Makalah ini merupakan satu penelitian awal berhubung kata adjektif dalam DMK, menerusi pemerian tentang jenis kata adjektif dalam DMK dan juga perbincangan tentang penggunaan kata penguat dalam frasa adjektif DMK. Berdasarkan hasil kajian lapangan di kampung Bukit Buluh, di Mukim Pedu, daerah Padang Terap, pengkaji telah menemui sembilan jenis kata adjektif DMK yang meliputi kata adjektif pancaindera, kata adjektif ukuran, kata adjektif emosi, kata adjektif waktu, kata adjektif warna, kata adjektif sifat, kata adjektif bentuk, kata adjektif suhu dan kata adjektif taraf. Salah satu ciri perbezaan yang ketara dalam kata adjektif DMK ini iaitu dari aspek sebutannya yang berbeza daripada bunyi sebutan kata adjektif yang terdapat dalam penggunaan bahasa Melayu Standard. Hal ini merupakan ciri khas DMK yang tersendiri, sebagai salah satu dialek Melayu yang dituturkan oleh masyarakat penuturnya di sebelah Utara Semenanjung. Selain itu, kata adjektif DMK juga mempunyai ciri unik dari segi penggunaan unsur kata penguatnya yang hadir dalam frasa adjektif DMK. Sejumlah 67 jenis kata penguat belakang bagi kata adjektif DMK ditemui dalam kajian ini. Kehadiran kata penguat tersebut berfungsi untuk menguatkan maksud atau memberi penekanan maksud yang terkandung dalam frasa adjektif DMK. Sebahagian besar penggunaan kata penguat dalam DMK didapati sangat berbeza daripada kata penguat yang terdapat dalam bahasa Melayu Standard. Sesetengah kata penguat tersebut hanya boleh muncul bersama dengan jenis kata adjektif yang tertentu, misalnya kata penguat *ang-ang* hanya boleh hadir bersama kata adjektif warna merah. Ciri ini berbeza daripada kata penguat dalam bahasa Melayu Standard yang lebih fleksibel kehadirannya dengan pelbagai jenis kata adjektif. Keseluruhannya, penelitian kata adjektif DMK ini dapat menambahkan lagi kosa ilmu kajian variasi dialek Melayu terutamanya yang memfokuskan aspek morfologi dialek Melayu Utara. Namun, kajian seterusnya diharap dapat meneroka pelbagai lagi skop penyelidikan berkaitan kata adjektif DMK. Misalnya kajian yang meneliti penggunaan kata adjektif DMK dalam konteks komunikasi media semasa dalam kalangan penutur DMK. Hal ini selaras dengan kepesatan media sosial baharu yang menjadi keperluan psikologi dan sosial penutur, dengan menjadikan internet sebagai tempat berinteraksi (Maslida, 2018). Justeru, diharapkan lebih banyak kajian-kajian yang akan datang dapat meneroka aspek tersebut mahupun pelbagai aspek kata adjektif DMK yang lain.

PENGHARGAAN

Penulis mengucapkan setinggi-tinggi penghargaan kepada semua informan di Kampung Bukit Buluh, Padang Terap, atas kerjasama yang diberikan, khasnya En. Saman Abdullah atas bantuan sepanjang kajian lapangan ini dijalankan.

RUJUKAN

- Asmah Haji Omar. 2008. *Ensiklopedia bahasa Melayu*. Kuala Lumpur: Dewan Bahasa dan Pustaka.
- Asmah Haji Omar. 2015. *Susur galur bahasa Melayu*. Dewan Bahasa dan Pustaka: Kuala Lumpur.
- Chambers, J. & Trudgill, P. 1998. *Dialectology*. Cambridge: Cambridge University Press.
- Kartini Abd. Wahab. 2013. Tinjauan Pembentukan Struktur Pasif *Di-* berdasarkan Tiga Pendekatan Tatabahasa Generatif. *Jurnal Melayu*, Jilid 2, 30-50.
- Mashetoh Abd. Mutalib, Hishamudin Isam, Yusniza Yaakub, Marzalina Mansor & Faizah Ahmad. 2020. Menelusuri kajian dialek melayu Kedah. Kertas kerja yang dibentangkan dalam Persidangan Antarabangsa Sains Sosial dan Kemanusiaan, dalam talian, 24-25 Nov.
- Mashetoh Abd. Mutalib, Hishamudin Isam, Yusniza Yaakub & Marzalina Mansor. 2021. Mengkonspikan kosa kata kata adjektif sifat dalam dialek Kedah. Kertas kerja yang dibentangkan dalam Persidangan Antarabangsa Bahasa, Sastera dan Budaya (RENTAS), Universiti Utara Malaysia, 2-3 Jun.
- Maslida Yusof. 2018. Trend Ganti nama diri bahasa Melayu dalam konteks media sosial. *Jurnal Komunikasi Malaysian Journal of Communication* Jilid 34 (2), 36-50.
- Mohd. Tarmizi Hasrah & Mohammad Khairulanwar Abdul Ghani. 2021. Dialek Melayu Baling: satu pemerian awal. *Jurnal Bahasa* 21 (1), 193-216.
- Mohd. Tarmizi Hasrah. 2022. Hulu Tembeling sebagai pusat difusi dialek di lembangan sungai Pahang. *Jurnal Melayu* Vol. 21 (2), 133-148.
- Nik Safiah Karim, Farid M. Onn, Hashim Haji Musa & Abdul Hamid Mahmood. 2008. *Tatabahasa dewan edisi ketiga*. Kuala Lumpur: Dewan Bahasa dan Pustaka.
- Nor Hashimah Jalaluddin, Adriana Santa Tinggom, Siti Noraini Hamzah & Hayati Lateh. 2019. Penyebaran dialek melayu satun di langkawi dan di thai: satu kajian perbandingan berasaskan geographic information system (GIS). *GEMA Online® Journal of Language Studies Volume 19* (1), 77- 96.
- Nur Habibah C. R, Rahim Aman, Shahidi A.H. 2021. Kesan persempadanan kawasan berdasarkan kajian linguistik bandingan. *Geografia Malaysian Journal of Society and Space* 17 (4), 45-61.
- Nur Habibah C. R, Rahim Aman & Shahidi A.H. 2023. Perkembangan sistem vokal dialek hulu Perak utara (DHPU): dahulu dan kini. *Jurnal Melayu* Vol. 22 (1), 67-88.
- Nur Husnina Zahari. 2022. *Unsur-unsur dalam kesalingfahaman dalam dialek Kedah di antara generasi tua dan generasi muda di Kampung Sungai Udang Yan, Kedah*. Projek Penyelidikan, Sarjana Muda, Universiti Malaysia Kelantan.
- Nur Sufiah Azmi & Maslida Yusof. 2020. Kata “Kesangatan” dalam frasa adjektif dialek Terengganu. *Jurnal Melayu Bil 19* (1), 124-148.
- Nurmiza Zulaikha Hamzah, Hasnah Awang & Fauziah Hanim Md. Yusof. 2023. Pengaruh dialek Kedah terhadap fonetik dan leksikal kata soal pelajar PISMP: satu kajian kes. Kertas Kerja yang dibentangkan dalam I-RoLE 2023. Noble Resort Hotel, Melaka, 13-14 Mac.
- Nurul Shahida Jamil, Maslida Yusof & Karim Harun. 2016. Dieksis sosial dalam interaksi masyarakat Melayu Kedah. *Geografia Malaysian Journal of Society and Space* 12 (1), 44-61.

- Nurul Shuhada Shafie, Shahidi A.H., Rahim Aman & Muhammad Norsyafiq Zaidi. 2023. Dialektologi bandingan varian hulu Terengganu: satu analisis tinjauan literatur sistematik. *Geografia-Malaysian Journal of Society and Space* 19 (2), 217-233.
- Shahidi A.H., Mohamad Firdaus Azaharuddin & Rahim Aman. 2019. Variasi leksikal ganti nama diri dalam varian ulu Berang. *Akademika* 89, 125-137.
- Shahidi A.H., Ain Atiqah Latiff, Muhammad Syahmi Syabri, Muhamad Faiz Fauzi & Riduan Makhtar. 2020. Penelitian akustik dialek Kedah. *Jurnal Melayu Isu Khas Disember*, 577-594.
- Yusniza Yaakub, Hishamudin Isam & Faizah Ahmad. 2020. Dimensi baharu penggunaan ungkapan darjah penghabisan dalam dialek Kedah. Kertas kerja yang dibentangkan dalam Persidangan Antarabangsa Sains Sosial dan Kemanusiaan, dalam talian, 24-25 Nov.

Biodata Penulis:

Nur Hafizah Termizi adalah graduan Program Pengajian Bahasa Melayu, Pusat Kajian Bahasa, Kesusasteraan dan Kebudayaan Melayu, Fakulti Sains Sosial dan Kemanusiaan, Universiti Kebangsaan Malaysia. Penulis berminat dalam bidang kajian morfologi, sintaksis dan dialektologi.

Kartini Abd Wahab (PhD) merupakan Pensyarah Kanan di Pusat Kajian Bahasa, Kesusasteraan dan Kebudayaan Melayu, Fakulti Sains Sosial dan Kemanusiaan, Universiti Kebangsaan Malaysia. Beliau mengkhusus dalam bidang sintaksis.